

Uno dil Consejo di XL zivil vechio.

† Sier Sebastian Loredan, fo podestà a Pieve di Sacho, qu. sier Zuane, ducati 100 e il don	535.190
Sier Michiel Nani, fo Cao di XL, qu. sier Francesco.	283.443
Sier Agustin Miani di sier Zuan Francesco, ducati 100 e il don.	376.360
Sier Hironimo Zigogna, fo zudexe extraordinario, di sier Francesco	290.464

Uno dil Consejo di XL criminal.

† Sier Vincenzo Manolesso, fo castelan de la citadela di Zara, imprestò ducati 50 e il don	440.306
Sier Zuan Barbo, è a la Taola de l'Intrada, di sier Beneto	359.394
Sier Nicolò Arimondo di sier Piero qu. sier Nicolò	293.469
Sier Zuan Nadal, fo Cao di XL, qu. sier Bernardo.	399.351

Fo stridato far, il primo Gran Consejo, Conte a Zara, Oficial a le Raxon vechie e Podestà a Este.

139 *A dì 26.* La matina, fo letere dil provedador Gradenigo di eri sera, *de occurrentiis*, et danari auti etc., nulla da conto.

Dil provedador Griti, da Villafranca, di 24, hore 4. Come, ricevute nostre di 22 con letere a l'orator in Franza, risponde ha zà scritto in Franza esso Provedador a l'orator nostro, et manda la copia di do letere scrite. È in travajo per la contribution si ha a far de le spexe a le zente francese. È venuti li do citadini mandati dal retor di Brexa, domino Scipion Lana et domino Zuan Francesco dil Ducha, con i qual ha parlato, et *licet* sia una spexa grandissima, *tamen* è stà contenti aziò francesi non vadi su quel territorio, et tutto volentieri sopportano. Poi parlò con monsignor di Lutrech, qual tien l'acordo seguirà, et si arà Verona; et hanno parlato dil far le spexe: è contento per zorni 10 over 12 farle, ma saranno ben 20, et comenzerà Zuoba a dì 27. Scrive ha fato la monstra a li fanti dil conte Federico di Bozolo et li lauda assai: sono provisionati 1266 restati in 1006, et scrive, zerca darli li so' danari, a dì 16 compino il tempo. *Item*, faria la monstra a li lanzinech si havesse di pagarli, et li

sminueria. Sono zente pericolosa, ozi hanno fato rumor contra il Colateral. Scrive, di Brexa ha auto ducati 1000, trati dil sal, et di Bergamo per più conti ducati 1500. Todeschi non vol aspetar un hora al suo tempo di aver li danari; sarà ducati 4000. Vien el tempo a la fin dil mexe la paga a li spagnoli; e se avesse danari faria assa' ben a' francesi; bisogna darli per el resto de la paga vechia da ducati 5000, ma voleno la presente, vien a compir a dì 4 Dezembrio; et la paga di venturieri vien a le fin dil mexe. Scrive si provedi di danari. Ha auto ducati 2000 dal provedador Gradenigo, suo colega, per pagar li cavali lizieri; dal canto suo, ha principià a pagar Zuan di Naldo per mandarlo poi a la soa guarda di Carvin, etc.

La letera scrive esso Provedador in Franza a l'orator, di 21. Scrive aver visto sue letere di 12. Come il Christianissimo re ha auto aviso di soi oratori di Bruxelles, quel Re con gran solennità ha acetato l'ordene di San Michiel, e non voleno far altramente l'acordo se non *ut in litteris*, per il che essi oratori vol partirsi. Et che quella Maestà è fuora di speranza habi a seguir più acordo. Et scrive a Lutrech voy far il tutto di haver Verona. Risponde, si duol che per avanti si habbi potuto aver quella cità, e Lutrech non habbi voluto tuorla, et al presente il Re vol la toy, e lui dice voler levarsi con le zente se non se li atende alcune soe richieste grandissime, et vol lassar 200 in 300 homeni d'arme de soi qui, 139* e 'l resto, che è 6000, mandarli alozar sul brexan, e che 'l marchese di Mantoa contribuiria a le zente restasse de qui, *aliter* vol andar a Milan a riposarsi con tutte le zente o si dagi alozamento a cavalli 700 soi, dicendo poi, Mantoa non vol contribuir etc. sichè si vede tra l'acqua el foco, di mala voia; però vadi al Re, pregando Soa Maestà voy far pagar le sue zente, et di fanti 16 mila nui pagemo, non ve ne hanno 7000, et Soa Maestà provedi, et che li 400 homeni d'arme vol levarsi, restino, et in questo usi diligentia.

Letera dil provedador Griti, di 24, a l'orator in Franza. Come ha ricevuto soe di 13 et 15, et poi di 16, con li articoli etc., e letere d'Ingaltera, per il che monsignor di Lutrech è contento restar, ma vol se li fazi le spexe; la qual cosa non è possibile a farlo per più di zorni 10 over 12 a cavalli 7000, come sono francesi, per el qual tempo ha contentà; et andando de longo, saria da ducati 40 mila al mexe, spexa a la Signoria insuportabile. Però parli al Christianissimo re, scrivi a Lutrech sopra questo, et aver Verona importa molto a la Sua